

Malaysia2020: Apakah Parlimen akan dibubarkan?

AstroAwani

25 Februari 2020

Isabelle Leong,

STATUS Kabinet Pakatan Harapan yang terbubar beserta pelantikan Tun Dr Mahathir Mohamad sebagai Perdana Menteri interim oleh Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah sudah jelas.

Namun, persoalan yang masih timbul ialah apakah Parlimen akan dibubarkan juga?

Menurut Peguambela / Peguamcara (Salehuddin Saidin & Associates), Datuk Setia Salehuddin Saidin, Parlimen tidak terbubar kerana tiada permohonan daripada Perdana Menteri untuk berbuat demikian.

“Dewan Rakyat tidak terbubar kerana tiada permohonan.

“Pembubaran Dewan Rakyat hanya boleh diperkenankan oleh Yang di-Pertuan Agong.

“Yang di-Pertuan Agong tidak ada budi bicara untuk terus membubarkan parlimen tanpa permohonan daripada Perdana Menteri,” kata Salehuddin apabila menjadi panel pada Buletin AWANI Khas, pada Isnin.

Jelasnya, pembubaran Parlimen hanya boleh berlaku jika Perdana Menteri merasakan bahawa beliau tidak lagi mendapat sokongan majoriti daripada ahli Dewan Rakyat.

“Pembubaran Parlimen hanya akan berlaku jika Perdana Menteri diundi tidak percaya oleh Ahli Dewan Rakyat.

“Maka Perdana Menteri mempunyai pilihan untuk mengadap Agong untuk memohon kepada baginda untuk membubarkan Parlimen.

“Yang di-Pertuan Agong mempunyai budi bicara untuk menerima atau tidak menerima permohonan untuk pembubaran Parlimen,” tambahnya.

Pada ketika ini, Dr Mahathir menerima sokongan untuk meneruskan tanggungjawab sebagai Perdana Menteri dari pelbagai parti termasuk pihak pembangkang.

Justeru, Parlimen tidak boleh dibubarkan melainkan terdapat permintaan daripada Perdana Menteri sendiri atau disebabkan sudah tamat tempohnya iaitu selepas lima tahun.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-politik/malaysia2020-apakah-parlimen-akan-dibubarkan-231648>